

Dörflegeischer 1995

Wenn du wotsch mit dim Chare Outobahnfare,
Muesch e Vignette ha, do sy mir üs im Klare.
Jetz choschtet dä Chläber, Potz-Gopfridstutz,
Ganz eifach happigi vierzig Stutz,
Und wenn ne wotsch a d' Schiibe chläbe
Bruchsch e Tube Araldit, dass är tuet häbe !

Die Müra-Sack-Gebühr isch z' tүүr,
Do isch üs allne nūmm so ghүүr.
Mir hei e-n-Idee, wo üs würd befreie :
Statt ds Ghüder i die Müra z' gheie,
Tüe mir d' Müra-Bosse mit em Ghüder ybschliesse,
U nächhär all die Seck hingere Mond lo schiesse !

Wotsch z' Biel parkiere, wirsch vor Ärger grau,
und ggesch grad numeno überall blau,
Ir blaue Zone wärde Buesse verteilt,
Ir rote Zone wird zum Fänschter usegheit,
Doch der Sheriff isch nid zur Rueh us z' bringe,
Und foht jetz fröhlech afo singe:
" Ja ja so blau blau blau muess die Zone sy,
Gseht Dir das jetz y, gseht Dir das jetz y,
Ja ja so blau blau blau muess die Zone sy,
Gseht Dir das jetz ändlech y ! "

Üsi Fussball-WM-Final-Prognose
Isch üs leider gwaltig i d' Hose,
D' Schwobe hei müesse Fädere lo,
Ou d' Schwyzer si nid i Final ine cho,
All das nume wägem Sutter Meieli,
Und dām sim brochne chline Zeieli !

Für das Swatch-Mobil do macht me so Gschichte,
Wott sogar e Riese-Fabrik errichte,
Doch die ganzi Planig isch für d' Chatz,
Me fingt im Elsass e günschtigere Platz,
Aber vielleicht isch doch nid alls vergäbe,
Und mir dörfe no der Swatch-Chläber aachläbe !

"Nach mir Diagnose eidütig schwanger",
"Nei, das isch Blinddarm", meint der anger,
"Jä, die Frou darf no nid hei,
Die hett ir Lunge Niereschtei",
So ungefähr tönts zu Zite,
Im Regionalspital bir Arztvisite !

Was Dir uf dām Biudli do chöit gseh
Isch e Sonder-Marke vo'r PTT,
Mit ere überdurchschnittliche Fantasie,
Fingsch sogar use, was das söu sy,
Für die, wo no nid druf sy cho,
Hei mir no grad d' Uflösing do !

Oje, oje, ojemineh,
Der EHC isch nienemeh

Halt, Halt ! ----

Das hei mir doch scho letscht Johr gsunge,
Und jetz sy si wieder glich wyt unge,
Für ds Loch ir Kasse chönne z' stopfe,
Sött me meh Lüt i ds Stadion locke,
Mit dere Videowand sötti das doch glinge,
Wenn si während em Match würd' e Sexfilm bringe,
De gsächte die ufem Ysch ganz guet,
Wie me ne eigentlech ine tuet,
Es wär doch würklech auerhand,
E 4.Liga-Club mit so're Videowand,
Drum möchte mir üsi Bank nid beände,
Ohni Euch z' bitte , ou öppis z' spände !!